

克庵先生尊德性齋小集

程集序

古典文學出版社藏書

程何宋錄事參軍婺允夫氏也集何爲詩也文也詩何爲四言一爲五言古二十有六爲七言古十有五爲五言絕五爲七言絕三十有三爲五言律二爲七言律三十有九文何爲劄子十有七爲表十有一爲啟二十有七爲書二爲序二爲記三爲銘二爲跋四爲行狀三爲墓表一爲祭文一合而爲卷三爲冊一也曰尊德性何重其集也重其集何重其人也何重其人也宋至中葉傳斯道者新安朱子也允夫爲之內弟師焉自名其居

金行世系八集月  
曰道問學學於道矣朱子命之曰尊德性傳以道也夫  
朱子之道聞諸濂洛濂洛聞諸洙泗遠矣允夫聞於朱  
子問學是道德性是尊文以發之詩以宣之本末具焉  
是故重之重其聞道也裔孫地官仲朴獲敝簡於伯考  
校諸聞友而授之梓焉於惟重哉學以聞道程之曾孫  
念哉詩曰以似以續續古之人

嘉靖十年辛卯夏五月朔通議大夫都察院右副都御  
史總督漕運前進士大庾劉節

克庵先生尊德性齋小集序

自元和閒蘇氏有戲伊川程氏之語門人怨怒力排蘇氏由是學者黨分川洛朔識者非之紹興甲寅予自湘中來歸廬陵有錄事參軍婺源程洵允夫袖長書及所業一通相過合蘇程爲一家心竊異之已乃知其於朱熹元晦爲中表自其先世相與講學又酷嗜眉山爲三蘇紀年十卷閒以示予其於蘇氏父子出處詩文先後前輩議論之所及編纂略盡未幾洵以病卒於官後四年其宗人法曹萬里出君尊德性齋小集一編今

古律詩百餘篇記序書銘各二跋四說一誌表行狀祭  
文八敘事劄子五啟五十一大抵議論平正辭氣和粹  
蓋嘗記其師里人李繪之言曰道有遠近學無止法不  
可見其近而自止必造深遠而後有成此程氏學也又  
曰文以載道物有是理辭者達是理而已此蘇氏學也  
君之所傳實本於繪學者果可無淵源乎惜夫久困場  
屋五十由累舉入官主簿衡陽一轉而止不得發聞於  
世予故序其書以告來者少傅觀文殿大學士致仕益  
國公食邑一萬二千六百戶實封四千六百戶廬陵周

必大序

克庵先生程公之文簡而深粹而雅優游恬淡而無畢  
露之華蓋其淵源之出有自來矣周益公朱文公文章  
道業足以增重九鼎而公皆得以親友之則其他槩可  
知矣昔東坡論文云山川之有雲草木之有華實充滿  
勃鬱而見於外雖欲無有可得耶僕謂公之文亦然世  
有先後不能親公生前而讀公之文於沒後三歎之餘  
敬書其編後云宣教郎知徽州婺源縣事莆田方直孺

序

予與程君允夫居同邑學同術允夫在輩流中籍籍有聲而予出處差池未之識也及隨牒宦游始邂逅於廬陵見其說經史論古今亹亹令人屬耳不厭於是始恨相識之晚允夫亦爲予傾倒底裏過於舊交予自清江秩滿入中都爲博士久不聞問因詢鄉人之來者則允夫已捐館舍矣又四年予始來歸其壻黃君昭遠集允夫所著詩文屬予序讀之終篇大抵理勝而詞彩附之陶鍊蘊括俱不苟作蓋允夫早名薦書晚綴仕籍素所蘊蓄不獲見事業而惟寓於其文故所成就如此此足

爲不朽計遊於地下無憾矣昔者先友竹溪居士張公  
公子嘗爲予言爲文猶之善釀稻秫必時麴蘖必齊水  
泉必香投於一器旣熟去其糟粕沈濁在下菁華在上  
其色澄清其氣芬郁其味醇旨此良醞也惟文亦然讀  
允夫之文者當以是觀之著作郎軍器少監奉祠雙溪  
王炎序

敘

資謹按先錄參克庵先生諱洵字允夫與晦庵子朱子爲內外兄弟師事之嘗以道問學名齋晦庵爲易以尊德性而爲之銘先生式敬承之無怠齋故有集與凡所著咸逸莫傳宏治中先伯父東軒府君有慨乎此特汲汲焉乃獲是集敝稿一於從兄仲松所楮蠹墨渝代遠僅存府君喜弗勝以屬予小子資曰謹藏之資唯唯越如千年則以質於先友鳧山梅君爲補其脫者八訂其譌者十約而爲卷者三曰盍梓諸

資唯唯則奉以周旋於甌越之間又如千年至是始  
克就梓資迺載拜稽首而言曰是維吾先世箕裘之  
舊也是維大儒晦庵子朱子之門高足弟子也其所  
爲文豈資所敢知哉蓋嘗攷之維我先錄參先生初  
見晦庵以詩文求教而晦庵所以語之者聖賢大學  
之道居敬窮理之要反躬踐履之實至是復以尊德  
性之懿告之其言曰維皇上帝降衷於民何以予之  
曰義與仁又曰執玉捧盃須與顛沛任重道悠其敢  
或怠夫孔門教不躐等眞積力久一貫斯傳性與天

道非晚年不與聞晦庵之教家法孔氏曾是而驟語  
耶然則先生之所謂文豈資所敢知哉雖然竊有感  
焉昔者我夫子刪述之大論著之詳門弟子宜無弗  
記矣而中庸一篇猶有竢乎其孫而後傳昌黎韓愈  
氏之文陳言務去八代爲起宜亟傳矣何自唐迄宋  
中隔五季乃與歐文忠公遙遙相遇於異世之下先  
生生有宋盛時下距故元以迫於今三百餘年而使  
晦者以顯逸者以傳東軒鳧山二君子之功顧可泯  
歟其所未傳庸非我後人之責歟傳曰莫爲之前雖

美曷彰莫爲之後雖盛曷傳資於是乎有深感矣東  
軒府君諱孟河字德潤博雅能文克世其家蓋嘗螟  
祝乎資而今自有後矣鳬山諱鶚字幼和宣城人與  
資同舉正德丁丑舒芬榜進士

嘉靖庚寅長至前五日裔從孫資百拜敬書於金陵  
之鳳凰臺

克庵先生尊德性齋小集卷之一

榮木和陶靖節韻

我卜我居游息在茲有榮者木日封殖之本根旣固發  
生以時我時傾瞻中心慨而維人之生孰本孰根惟皇  
降衷天理具存是曰成性道義之門欽斯承斯大化以  
敦嗟彼世人自安淺陋德不圖新惡或念舊有干惟祿  
有覬惟富孰能毅然不爲利疚我懷師訓罔敢失墜匪  
道曷從匪義曷畏聖門雖遠率焉以冀庶幾疲驚久亦  
告至

資按家藏錄本榮木篇下別有二詩并題俱盡敞  
不可辨認不得已節而去之後凡殘缺處皆然

張允迪出示方清老詩用韻簡之

十里五里聊幽尋遠山近山相對陰煙雲變態晚逾好  
竹樹蔥蒼秋未深故人見我喜欲舞倚杖共看鴉投林  
呼兒秉燭語清夜炯炯君應識此心

度黃瓜嶺

十年來往黃瓜路冒日衝風凌雨霧今朝短策又披雲  
一笑成詩復悽楚我行對鏡并浮觴欲攀星斗摩蒼穹  
黃瓜雖小亦其亞領略鱗鱗千萬峰

次方唐卿對月見寄

芒屨卻走荒山道始覺在家貧亦好歸來對月思故人  
寂寞柴門迹如掃故人遺我新詩章反覆幽懷欲傾倒  
恍如明月墜我室炯炯清光滿懷抱祇今秋稼已如雲  
飽意可緩憂心禱潑醅酒熟君不來遠思縣縣滿秋草  
張衡山南山瑞芝

君不見見南山昔有龐翁叟道德高風聳山斗茹芝歲久  
得長年身與此山俱不朽張公道與此老同失身偶墜  
世網中卻從神武挂簪紱林泉歲晚殊從容壽宮誰遣

芝生柱三秀煌煌照庭宇平生心地只天知天遣芝爲  
靈府助商山之老長茹芝公雖不茹亦不疑商山南山  
兩不朽公壽定應山與齊

伯羽許見過雨不果

結廬在溪上觸目皆可娛嗟予亦何爲悠悠事征途鄉  
閭駕言歸計日抵舊廬春風百花老遶屋桑柘疎念無  
肯來入門庭日荒蕪之子獨有期猶以雨意拘人生感  
離合惡懷固難舒寄言我懷人念我當焉如

度鳳凰嶺次董叔重韻

連山翳寒雲孤松秀巍嶺松吟石漱水山露髻撐頂我行亦何事歲晏苦淒冷頻有同心人哦詩味雋永

了頭巖用前韻

側看初成峯橫看復成嶺何年古仙人飛步緩

梅云緩當作凌

絕頂至今兩髻了縹緲煙霞冷安步

梅云步疑作得

躡荒遐長

嘯清夜永

用前韻入閩

風雪武夷溪乍阿還復嶺依依鴉共林片片雲摩頂山中有高士紙帳梅花冷相期從此翁晤語冬夜永

用前韻懷兄晦翁

人皆樂夷塗而憚陟崖嶺不折彭澤腰卽摩墨氏頂誰  
能如此翁獨臥滄波冷寂寞詩書林優游歲年永

同正思叔重發潭溪度梅嶺用前韻

山行已淒迷而沉步脩嶺飛仙不可見誰復撫我頂懷  
人雲嶠長倦憩石磴冷樵斧忽丁丁彌覺清晝永

汪節夫解官東歸賦此贈行

積潦卷洪落秋容媚郊垌登高望長陌念君將有行君  
生盛德後家世多簪纓尚書望最重當代推名卿幾年

臥東山屬望勞蒼生天亦陰相之芝蘭滿堦庭君子尤  
可人少日負俊聲曼倩聊玩世子真豈求名一官姑自  
慰三歲俄終更我從韓溪來挽袂仍班荆殷勤故舊意  
丁寧離別情聖門雖高遠心地當恢宏篤敬已可克致  
知義方精造次勤鑽仰從容自規繩他時立朝右風節  
彌堅貞江湖秋多風歸途眼增明引首看高舉毋辭事  
遐征

初發豫章

昨日苦暖今日寒樹頭淅淅風聲乾舟師祭罷喜風便

呼兒理楫高挂帆孤舟一葉去如舞白浪翻空作飛雨  
爾曹醉膽何大耶胡不江雲占砲車

夜泊華家埠

江涵寒月明人掩孤篷臥蕭蕭木末風驚我幽夢破心  
閑萬念寂枕穩千波妥時聞掠水聲知有魚舫過

初泛湘江

昔聞瀟湘好今作瀟湘遊雨餘萬籟息夷猶任輕舟黯  
黯雲幕垂漂漂浪花浮故人在何許悵望心悠悠

送楊文父還醴陵

君家江西我江東相望雖遠聲氣同一行作吏湖湘上  
數面成親談笑中君思松竹行色動我困簿領蜚塵蒙  
他時登高倘有賦莫望梅云望當作忘江頭回鴈峰

送陳求仁還永嘉兼寄劉孝移

往年予口

梅云口疑作館

祁山丞坐上屢聞君姓名那知流落

天一角一笑共挹湘江清地縣賦急員羞具黃龔退軌  
空馳溯催科撫字兩勤勞古道羨君今獨步耒陽之水  
化理濡耒陽之人何于于疎梧細柳白日淨唯有聲氣  
與君俱君今快展摩天翮會看赤手扶羲御煙波渺渺

正愁予萬里瀟湘未歸去河陽當日桃花紅主人好客  
樽不空相逢倘問衡陽簿爲說年來憔悴容

次韻趙祖德送李衡陽有感

秋日曬古城秋風來水鄉臨流送歸客離思飛雲揚銀  
液深蘸甲金釵儼分行祖行禮雖微善頌意則良破涕  
忽成笑欲語旋復忘若人工涉世止涕非揚湯俛首是  
非海如居清淨坊一朝脫屣去翩如鴈隨陽三折僅存  
臂九回無復腸所欣返全璧詎復憂焚岡我本山林人  
才非錐處囊偶然踏朝市包以冠與裳誰吹鄒子律自

分冰氏涼餘習但文字殘星弄微芒來時岸柳綠倏見  
秋葉黃何當首歸途解此名利韁湖山足佳處與君共  
徜徉

趙詩云終當計勇  
決湖山足徜徉

### 謁杜子美祠

少年誦公詩諷詠忘日夕晚爲湖外遊適有耒陽役仙  
人梅子眞邀我連轡策蒼山環古城幽路轉石壁叢祠  
隱木末古冢纍道側衣冠尚唐制金石存古刻緬懷天  
寶年綱紀絲茅劇肅代雖中興安史互攘賊風雲暗宇  
宙蛇豕莽區域生靈困魚爛廊廟鄙肉食崎嶇兵戎閒

公亦屢顛踣時危孰與持忠憤氣彌激炯炯心懷丹蕭  
蕭髮垂白與來謾吟哦賦罷還歎息區區杞人憂此意  
誰復測至今杜陵編義與風雅敵人亡遺像在廟古爐  
香寂庭花日日紅堦草年年碧公身不可見公心猶可  
識惟餘耒陽流與君共無極

潘提刑生日四首用以介眉壽爲韻

泉以沙故渾草以風故靡誰能表獨出屹若柱立砥先  
生抱懿德取喻當奚以孤高衡嶽松清潤湘江水  
華堂敞千楹居者嫌陋隘安知圓扉中蟻蟲生柎械先

生慮囚時矜測逮鮮介此心卽天心不爲門閭大  
天心本廣大有外寧合之咄哉客驕者妄自分町畦先  
生克己學不起一念私斯道愈光新渠用夸揚詹  
賢者必得貴仁者必得壽天人何閒然如契鑰相受先  
生邁種德無覲報自厚應笑昌黎翁區區說南斗

遊獅子巖

南州風氣殊二月若中夏我從來江來無地稅征駕縈  
紆躡蘚徑問訊得精舍石崖屹傍起峭壁儼難跨嵌巖  
忽中間宛宛如覆瓦日光何處來返照幽以雅獅猊騁

其勇踞坐頤頰哆欲爲河東吼解使百獸啞應是山靈  
護豈容俗人假茲遊真勝絕欲去重嗟咤老僧勸少畱  
秉燭語清夜那知巖伏情眺玩不可舍他年倘復來陳  
迹猶可藉巖前有隙地分我茅一把

游浯溪用張宛邱韻

六合塵昏誰汛掃秦王功業成橫草後裔居安不慮危  
欲向溫柔鄉裏老漁陽金鼓動地來羯胡本非劉石才  
若爲二十四郡守如振稿葉彈浮埃皇天悔禍見星紀  
太白入月胡當死英英李郭爲時生濟世何須識丁字

祆災已去瑞慶來何人大筆書丹崖南 猶自頌聲作  
中天想見氛祲開遺文三復堪悲慨興廢渾如目前在  
咄哉誤國高將軍猶歎兩京作斤賣

遊東安五峯閣凜然亭

穹林擁精廬奇石林端起玲瓏蛟兔穴編綴東方齒  
峩倚高寒落落負壯偉何人昔好事誅薶發天閤傑閣  
冠其顛幽亭踞其趾五峯天際來縱與供燕几吾聞零  
陵郡地蘊清淑氣法當產瑰奇鍾秀乃在此何當蠟吾  
屐盡攬入胸次融成九華詩寫作菱溪記卻笑奇章公

班班刻名字

過愚溪登愚亭拜柳子厚像

我從來陽來已拜杜陵墓今行湘水湄復識愚溪路茲  
遊豈無益登覽屢弔古明日理扁舟又向浯溪去

薛使君生日

春來一雨不終日處處野田龜兆坼使君閔雨雨應期  
插水新秧綠如織人言秧好歲定豐民感使君慈父同  
生朝共上千歲壽酒酌流霞花裊紅使君爲德豈但此  
念念愛民如愛子陰功無數只天知報以長年固其理

青衫短簿人莫知索米不充方朔饑香山松鶴舉無有

但采民言成頌詩

東坡嘗以沈香山子爲黃門壽劉景文嘗以松鶴圖爲東坡壽

### 次韻劉子厚人日立春

流光馳兔烏弱質感蒲柳新年有樂事菜羹侑甘酒

歲時

記人日煮七葉菜羹

楚俗本自佳顏巷敢嫌陋陶然爲一醉闊步

無何有畫屏貼綵人赤牛負土偶誰能效兒童翦飾較  
妍醜城南有佳士避世不同首詩成試問之如此近道  
否鈍根君勿嗤著語不敢苟

### 劉寺簿所居五詠

墨莊

先生耕道時萬卷皆其具歲晚德已豐萬卷猶如故

洌軒

理鑒完新發披沙挹舊清一瓢遺味在雋永若爲名

靜春堂

氛埃痛掃漑鄰里謝將迎默坐無餘念欣欣物自榮

玩易齋

萬變本六畫六畫來何從此理須玩索明窗露未濃

君子亭

食藕痊沈疴製荷被吾體未如對芳華幽貞似君子

次韻劉寺簿暇日出郊按視貢院安養院漏澤園

南教場飯於花藥寺用韋蘇州韻賦詩

使君抱孤韻勝日成獨遊聊循七里郭一賞千林秋射  
圃旣徘徊澤宮重咨矚孰生病我療孰死骨我收遐觀  
興未窮小憩山更幽昔人事登覽不憚道里悠而我縛  
微官抗塵苦淹留何當奉杖屨崇論排田駒

余季行肯堂

天地有常運成功須四時斂藏苟不至生養猶浪施而

況結夏屋豈伊一人爲向非來者賢俯仰成棄基余氏  
本望族舊業祖所貽流光被累葉衍也復嗣之華堂小  
荒茆新築俄翬飛老木傲風煙脩篁拂雲霓連峯累奇  
石一鏡開清池窗閒編簡橫門外塵鞅希封胡幾男子  
晨夕相追隨步趨朱與張談笑書與詩寧復綺紈習所  
期君子歸青桐韓家樹丹桂竇氏枝它年定儷美吾言  
豈君欺

次韻張順之見寄

詩翁老去百年灰

梅云年灰當作年木  
禪語也山谷好用之

皮膚剝落眞實

在誅茅築室傍幽林  
泉石煙雲動光彩  
酸寒不作郊島

態尚友淵明向千載  
但欣妙語筆端生  
不管流年暗中

改鄰家有景借脩竹  
公有借竹軒  
野徑無風馥芳茝  
人嫌柴

門雀可羅自倚奚囊富  
成海我聞公名嗟已久  
嚮風每

恨平生昧袖詩過我  
豈宜蒙公才較不幾  
十倍要從柳

州鬪雅健未許公羊誇  
辨裁別來又見秋風  
高抵掌論

文幾時再尊中綠酒  
已堪酌籬下黃花行  
可戴幸無俗

物惱幽人祇可劇談  
佳客對方侯況是社  
中酒梅云酒疑作人

上酒下蔬中言陪賓  
辨舌瀾翻似秦代公  
來當爲折簡

之佳又云疑作侶

呼園有佳蔬更同采雅集何須畫作圖風流自可追前

輩

近世有佳集圖來詩云憑誰爲寫無聲詩清標不減淵明輩

贈寫真方處士

世久無絕藝斯人妙丹青時將好東絹貌彼神與形悠然意象會轉轉毛骨生或濯若春柳或清如壺冰或聳千丈壑或森武庫兵妍媸有真鑒抑揚無遁情楚相欲談笑中郎存典刑斯人胸次奇不以藝自名逍遙萬物閒非俗仍非僧遊戲於筆端遂爾造其精殊非學可致要是天與能待詔集金馬功臣圖景靈渠當自致此胡

爲老沈冥

畱別處州陳舜卿教授以筆贈之

中歲探至道頗欲齊得喪偶然遇逆境又爾起諸妄賢  
哉陳夫子胷次甚夷曠警我以微言恐我猶事障嗟我  
與夫子少長異州黨傾蓋逆旅中談笑便抵掌誰言江  
浙遠嗜好無異尚我雖謬涉世途窮理歸鞅而君方朝  
天高論獻忠讜贈君秋兔毫聊以代盃盎勿云管城子  
未有食肉相當知中書君日侍九天上

董銖求詩賦古風二章示之

森森山上松濯濯堂前柳顏色雖不殊霜餘別妍醜君  
看射利子榮悴俯仰中寧知堂前柳不如山上松  
學海失淵源詞林少根柢蘇程百世師遺書滿天地遺  
書亦言爾道豈言能傳言外有妙處萬理常森然

張衡州南山壽芝

煌煌慶色金壺重婉婉高枝兒臂拱團團更著綫暈紅  
鬱鬱時看祥靄動使君少日抱奇才可與斯世作楹棟  
黃堂坐嘯晚方貴急流引退心殊勇平生陰德只天知  
壽骨巉然天所縱靈華更向壽宮出和氣疑與商山共

翻嫌四老太多事采掇辛勤走巖隴何如邱壑著胸中  
靜閱世氛如幻夢朝餐不用閑草木夜氣自有眞鉛汞  
殊祥坐使神物效異卉不煩天女供閑中禪悅更尋源  
開裏塵緣徐脫鞵從渠童子尚饒舌強出松陰談谷董  
梅云谷董作骨董禪語也此篇多禪語要知無本是性宗看我當機呈大  
用

過鉛山望鷲湖峯次叔重韻

好山如高人堂堂萬夫傑嶽立培塿中千古磨不滅茲  
山雖未高濃淡似粧抹樹老樛枝重石皴靈液冽登臨

東坡先生集卷一  
恨未能想像心已豁寄言山中客慎勿厭幽絕君看名利途黃塵漲日月

宿野人家追和韋齋韻

澆愁正賴一蕉葉萬慮洗空從兀兀投牀便作礪砭眠  
不記來時石頭滑茅家亦復有何好門外澄江綠如鴨  
箇中風味吾自知賦詩歸向兒曹說

游石鼓次柯德初韻

簿書塵浣人高士莫肯顧我窮敢言高餬口隨所遇一  
遭猿鶴嘖詎能蟲魚注讀禮尺不盈披易體忘互案惟

朱墨塵吏執符移付催科本雖拙勉強亦備數有時迅  
檄來又辦走長路名山謾在眼俗駕不容駐茲遊豈無  
意發興亦已屢心知江山奇遠目當與寓冠裳裹病軀  
汲汲忘旦暮今日復何日從君舉幽步柳深尚藏鳥水  
淺可立鷺離離網舉魚隱隱舟橫渡登臨得勝地一覽  
萬景聚沉遠城市喧無復塵埃污六籍爛星羅百氏紛  
雲布窗虛明照人几淨寒生霧仰止夫子堂敬誦昌黎  
句文章何足言道義有眞趣由來重儒學所貴通世務  
恨我拙且迂浪奉先生屢明朝九衢塵回首迹已故重

來定何時詩就髮如素

次韻劉寺簿與客酌鄒泉

庭無聚訟喧門有佳客至登高一以眺天末鴈橫字公  
心本無著佳處偶會意意會旋已忘陶然不妨醉

幽閨

幽閨有美人終宵抱長歎念彼遠征客風露如許寒耿  
耿不成寐悵然理哀彈離鸞韻纖指曲終淚闌杆

秋風

秋風來幾日草木殊未知寒蟲獨何者若與秋有期露

竹動寒彩雲松弄幽姿夢尋溪頭路意行當何時

次韻胡國器游歷嵒

枯筇拄倒星斗傍意行屈曲忘陵岡忽逢蕭寺倚巖腹  
門前水影涵山光憑虛飄欲上霄漢覽遠浩如浮大滄  
嗟予失身墜世網恨不與子同翱翔白蓮共結清淨社  
紅裙絕意溫柔鄉何當脫屣聲利場從渠萬態爭炎涼

次韻荅唐卿歎梅

元冥元冥如有辭大鈞播物初無私春蘭秋菊亦有爾  
梅獨強分南北枝南枝北枝自有時人言冷煖浪自欺

天公與人不相似時來看取葭灰吹

黃彥周求秀亭詩云其地山水合六秀法故以名

亭

少年銳意功名會李廣數奇終鷁退晚從林下得幽棲  
綠淨翠微動賞對危亭蕭灑八九椽千巖萬壑相迴環  
人言山秀水亦秀偶然得此寧非天身世區區如逆旅  
人生要有歸全處天星地卦且置之陰德從來不知數  
會當置酒傍清樾一語壽君君笑發且住人閒五百年  
銜盃樂聖山水閒

張公成生日

沒膝春泥未易過華堂咫尺隔關河精神聞說年來健  
歲月從渠老去多開裏漸應排世事靜中正好養天和  
祝君壽骨如張果莫惜頻傾金叵羅

梅花

落木蕭蕭歲已深天教梅蘂獨爭新一枝嶺上方傳恨  
千樹江頭忽暗春會與霜筠矜節槩不同風柳鬪腰身  
羅浮當日醉眠起斗轉參橫誰與鄰

贈劉道人兼送何蕃秀才東歸

道人別我三年久邱壑胷中趣益眞更與風流能賦客  
來尋憔悴負病人明窗辨藥分寒燥清夜吟詩動鬼神  
促膝方歡又分袂別愁還與月痕新

兆察道中

偶作郊原十里行蕭蕭入袂晚風清夕陽疎樹無佳處  
只有殘鴉自在鳴

送張子有彥實舍人之姪

宴居仙伯已騎鯨猶子東來尚典刑才氣逼人春盎盎  
交情閱世柏青青昨朝方對聖賢酒今日又尋長短亭

歸路不妨攜古錦  
萱叢萑葉正芳馨

寄朱德芳

武林倉卒指歸程  
千里脩途偶竝行  
雲散風流當日事  
山長水遠此時情  
棲遲顧我猶藏拙  
邂逅煩君尚寄聲  
尺素聊憑西去鴈  
夢魂今夜遶江城

久雨初霽示友

積雨初收四望新  
頽雲淡日弄晴陰  
故園百里夢不到  
杜宇一聲春又深  
宿蝶亂紅渾滿地  
藏鴉新綠已成林  
客中情味君休問  
莊舄無聊但越吟

楊日新闢書室以月壺勝之求詩

清透虛簷冷侵空下弦祝罷且從容是中自有一天地  
何必更登天柱峯

此郎表裏久融明曾次悠然冰玉清虛室如今已生白  
不隨晦望有虧盈

張巨川爲父慶八十二邀予與坐作詩壽之

龜形鶴骨舊精神見了春容幾度新卻笑當年梁祕監  
更將多少較前人

官爲秦世柱下史生憶堯時丙子年家世從前多壽骨

侯封不必羨神仙

示伯羽

交遊半作搏沙散不見周郎亦四春邂逅相逢無一事  
依然都似舊時貧  
偃蹇我如蛙伏井飄零君似鵲尋枝回頭十二年前事  
一笑那能似彼時

次唐卿九日

無錢薄酒自難賒笑解塵衣到酒家只欠道人殷七七  
鶴林重發杜鵑花

祈山九日

客思到秋如亂麻每逢佳節倍思家黃花只作去年好  
綠鬢自嫌今歲華千里有情猶共月一樽無事且傾霞  
閑來甘露堂前坐老柳條條噪暮鴉

陪晦庵尊兄山行小憩龍居院

平生發興在林邱況復追隨長者遊路入亂山青未了  
秧分野水綠初稠劇談已有親朋樂小憩仍逢寺宇幽  
滿座春風與和氣對公無地可言愁

用韻送蔡季通還建安

騎氣居然兩月留勝遊不減舞雩遊道同頓覺語易契  
意合不知情自稠口口梅云口口疑摻袂二字還驚千里遠著鞭  
又踏萬山幽恨無力挽天河水爲我臨歧洗別愁

次韻喜雨

敲窗打葉不勝繁洗盡黃塵萬里昏便有清風生遠樹  
祇牽孤夢遶歸村新秔想見黃堆野老柳猶能綠映門  
自笑年來詩事廢得君強韻縮肩跟韓詩縮身潛喘拳肩跟

雨中書事

門無去馬與來車終日塵編自展舒笑撫蒲團時有會

古人於我未全疎

經邱久已罷巾車寄傲南窗意自舒一炷妙香清萬慮  
芭蕉葉上雨疎疎

予甲戌歲與惠州麥少韓始相會於都下後十九  
年復會焉今又六年而少韓見予益勤將東歸

爲詩四章以別

梅云麥少韓  
麥鐵杖之後

邂逅京華憶昔時匆匆長恨遽睽離重來只有聲音在  
兩鬢蕭蕭各欲絲

與君南北昧平生傾蓋論心若弟兄長笑區區市朝客

白頭重欲定交情

鼻祖功名冠有隋耳孫筆力近京西  
鵝城勿作潛深計  
鴈塔行看高處題

人去空山鎖碧雲  
紙窗竹屋尚明深  
蒼珉遺刻煩多寄  
慰我平生敬慕心

次韻張順之春日雜詩

解事東皇自有期  
今年春較去年遲  
未教紅著桃開臉  
先放青還柳作睂

春來何物不熙熙  
川泳雲飛各自奇  
趁隊魚兒如得意

窺人燕子似相欺

閑齋人靜日方中想見先生睡思濃只麼賞情

梅云情當作晴

盜用春睡賞春晴之語

殊有味趁衙雜沓任黃蜂

炯炯朝曦暖意回遲遲午景氣佳哉柳陰纔逐斜陽去  
花影還隨皓月來

沈水燒殘日未西舊書讀罷卷重披  
傍人欲識閑中趣看取先生宴坐時

寄張順之

踏遍危途興已闌倦飛幽鳥故知還  
手開高士蓬蒿徑

坐對先生苜蓿盤口口

梅云口口當是未恨字

揶揄遭點

梅云點當作點

鬼卻羞鬢鑱據征鞍侯封到底輸千首圓美當口

梅云口當

作似彈丸知

### 次韻順之見寄

梅子垂垂雨復晴田歌初報罷春耕敲門忽有詩筒至  
入手懸知句法精應聘申公何日去草元揚子幾時成  
知君不樂盃中物事業端期身後名

### 中秋夜久方見月

此夕清光本自多不勞玉斧更礮磨祗應雲物偶如此

未慼詩情可奈何喜見一輪還舊觀遙知千斛費明河  
先生賞罷渾無事古井依然湛不波

次韻楊日新出郊尋桂乃有送者

江文通詩蒼蒼  
山中桂團團霜

露色霜露一何  
繁桂枝生自直

月窟移來幾換星幽人何處得繁英行尋十里不知遠  
歸傍一牕相對清未與口梅云口兄較標格且邀松友  
當作梅定交情歲寒正爾團霜露尚有蒼蒼照眼明

次韻日新九日書事

登高不惜躡凌兢樂此佳辰古所名白墮從今無遠寄

黃花依舊弄秋榮  
霜凋萬木天地肅  
水落百川波浪平  
更喜晚來風力軟  
戀頭破帽亦多情

崇安道中

田如累級登高堂  
石如金華臥羣羊  
上梅下梅山路惡  
大將小將溪流長  
振衣欲度分水嶺  
回首尚憶楊家莊  
皆地名折花恨不逢驛使  
爲寄一枝還紫陽

過分水嶺

相與振衣千仞岡  
浩歌莫惜邱徜徉  
風來閩徼不知遠  
山接吳天如許長  
裘敝且將雲作氎  
囊羞猶可墨如莊

五言古詩卷之一  
眼明更向西南望依約家林傍夕陽

道傍人家瓶梅正思命賦詩

茅舍疎籬古道傍一枝的礫爲誰芳  
壺中春色從來別冷落全勝白玉堂

鉛山道中次叔重韻

煙翠空濛撲遠林氛埃那復犯靈襟  
歸程不恨風霜惡自有梅花識此心

瀏口山巖

牛羊久已下行李尚匆匆天挂新蟾白  
山連野燒紅問

途愁店遠沽酒歎囊空猶喜家山近籃輿曉又東

和正思贈別

同途欣得友欲別惜分襟去路無多遠離觴不厭深遊  
鱗尋舊壑倦翼帶歸音有底淒涼甚風霜攪客心

次董叔重贈別

波光草色照人明別意幽懷酒一傾飄泊君方驚旅夢  
淹畱我遂識人情穿沙碧幹娟娟淨帶雨幽葩豔豔榮  
何日相從溪上路臨流倚策話平生

次韻祖德九日

集卷之八 集卷一  
黃花歲歲與秋期又見登高落帽時雲水光中孤賞翫  
簿書叢裏足棲遲大篇且對玉連瑣小酌何須金屈卮  
只恐頽簷并敗屋不禁巽二恣狂吹

曉行湘岸竹閒有懷家山

琅玕萬箇倚江湘中有人家類辟疆地迴自應塵不到  
天開初見日舒光此身汨汨五斗役舊隱遙遙三徑荒  
想見韓溪溪上路煙稍雨葉拂雲長

湘岸道中

按行又復到江干近水遙山照眼寒從此瀟湘在胷次

不須更向畫圖看

渡湘江

萬頃澄瀾碧玉寬  
笑乘一葉自輕安  
綠蓑從此關心事  
待向煙林乞釣竿

白竹橋

向來過此日流金  
今日重來雪滿林  
輕弃簞瓢貪斗粟  
區區奔走愧初心

寒溪

溪名偶與故鄉同  
恍覺家山在眼中  
定自今宵更愁絕

又飛清夢過江東

過沙木橋懷趙公南

沙木橋頭野老家  
又來施檐酌流霞  
坐中只欠當時客  
欲寄南枝一兩花

道傍見牛舐犢有感

人物本來同一原  
於何卻作兩般看  
祇應氣質生時異  
差別從茲有萬端

泊高安市上夜雪

柏山高臥有餘清  
我坐高安似凍蠅  
卻喜明朝添偉觀

峩峩千里踏層冰

三月九日祁陽舟中聞鶻憶去年此日到衡陽有

感

急槳輕舟下碧瀾歸心切切隴頭鶻人生石火光中住  
又向湖南過一年

次韻劉寺簿臨蒸精舍落成

濂溪當日起南方千載斯文有耿光遺俗至今尊孔孟  
後生誰肯學蘇張賢關莫歎吳天遠精舍今臨楚水長  
試問坐中誰鼓瑟舞雩風味想難忘

再用韻

斯文從昔患多方今日因公晦復光  
心法祇傳書一卷  
文華那用紙千張  
窗前草色沿堦翠  
川上波流極目長  
此意更須公指示  
後來口口

梅云口口當作尚得字

月無忘

用韻題諸葛武侯祠二首

羣雄逐鹿走迷方  
四百炎精不復光  
天啟奇才思蟄奮  
人嗔黠虜久鴟張  
悠悠陳迹青編在  
寂寂叢祠碧草長  
成敗由來難逆覩  
祇應大義不容忘

獨明大義曉多方  
炯炯精忠貫日光  
開拓荆榛資蜀漢

驅除鬼蜮走關張司徒豈足知邪正著作寧能識短長  
公論到頭須後世至今尸祝未能忘

次韻劉寺簿詣學

衡湘山水競清雄閒氣曾生益代翁後學誰能明絕學  
遺風猶可想高風欲求太極精微蘊可乏羣居講究功  
飛躍鳶魚元有道使君心與古人同

次韻劉寺簿鹿鳴宴

江頭梅蘂小裝春式宴嘉賓屬守臣京國路雖千里遠  
瓊林花又一番新且觀鹿野陳鄉樂休憶羊裘整釣綸

重刊詩集卷一  
老我豈堪陪盛集爲公強振簿書塵

再用韻

聖主如天與物春四方委質願爲臣設科取士制雖舊  
側席求賢意自新揚子詞高非篆刻并春學富獨紛綸  
行行好上江都策莫厭京華沒馬塵

寒食次伯潛韻

小雨浪憎春日遲輕寒自與晚花宜節過嶺外憶飭日  
人比山陰脩禊時雀舌味長初試水貓頭意懶任穿籬  
俗以不成竹爲懶筍歸途莫恨石頭滑山色波光總是詩

張王臣以諸公驂字韻見貽卽席奉次

魯直詩山谷老人來

斗南棒頭有  
眼許人參

圓扉草色碧於衫晏子何勞更解驂  
賸喜文書清幕府翻嗟賓客滯湖南  
遲回愧我非高士邂逅因公尚劇談  
清夜論詩到山谷棒頭妙旨欲重參

再韻呈諸公

羞將華髮照青衫直擬涼秋整去驂  
應聘豈能如水北紬書何事尚周南  
江澄頗覺客愁破山好那須世事談  
猶勝元琳日趨府強持簪笏逐髯參

再用韻呈王臣兼簡同社諸公

亭下江波綠樣衫亭前山勢走驚驂心如胡馬猶思北  
夢比飛鳥正遶南銀筆新書時有省金鑾故事不須談  
經綸從昔須賢哲洗眼諸公國論參

送劉伯瑞通判還吳興

土牛方著勸農鞭畫鷁俄聞疊鼓喧別駕但知催理楫  
邦人政自欲攀轅黃堆荒徑重尋菊綠擁高堂更樹醵  
只恐清朝方急士未容一室老陳蕃

王駒父袖詩見過次韻贈之

平生志業在經綸老去未充觀國賓  
口道心心口地鏡  
固應文口挂夫紳

梅云夫紳作天紳孟郊語

大兒從昔輕餘子丞相

何時薦此君莫爲窮通移晚節歲寒方始見天真

次韻宋郎中劉寺簿劉監廟燕集王大夫山林

飛旒翩翩亂晚霞欣聞勝集俯雲沙  
新詩宛似風行水和氣想如春在花  
大隱勿嫌朝市鬧朱幡方映繡衣華  
塵埃短簿今倉氏悵望清遊轉覺賒

季章命賦周益公府雙頭蓮蓋太守所送者

桃根桃葉競妍華清遠誰知別有花  
天爲蒼生娛一老

地從綠水湧雙葩流傳已入騷人句走送曾煩刺史家  
卻笑昌黎求玉井路迷青壁重咨嗟

益公得牡丹狀如雙魚者以花嬪目之且賦詩俾

子屬和

粧鏡臺前酒一卮風流從古說楊妃誰令山鬼欺紅粉  
卻與花王司御衣比儼莫嫌魚共貫輕狂猶勝燕爭飛  
老生無分陪清賞空想鄒枚他夜歸

寄贈歐陽伯威

窗閒花影夜搖春窗外誰呼祁孔賓不信名山謝逋客

至今陋巷臥遺民日高謾戛生魚釜門掩應無沒馬塵  
遙想撚鬚時得句又書尺紙報平津

贈別

搔頭日日數歸程誰信先生少宦情趣駕不知千里遠  
振衣始覺一身輕霜林竹柏元同勁世路風波底用驚  
獨我臨分苦悽惻從今懷抱向誰傾

王守仁竹齋

黃塵車馬去如流名利勞人死不休心遠地偏何處是  
小齋叢竹嬾深幽

月度寒光影瘦疎風傳清籟韻虛徐幽人宴坐蒲團穩  
讀罷儒書讀佛書

楊日新用所賦月壺韻作詩見寄依韻復之

霜凋羣木鴈橫空宴坐茅茨促膝容忽有新詩來眼底

巉

梅云巉當作恍  
蓋用富嘉謨語

臨絕岸倚孤峰

觀心要與月同明覓句應須水樣清老去不妨文豹隱  
郎君已見角犀盈

喜雨用山谷韻呈薛使君

畏日炎風是處同使君閔閔甚三農新詩仰看奔牛堰

東坡詩仰看古堰橫奔好雨忽迷回鴈峰千里祇今被  
牛之句蓋言吳中旱狀  
膏澤一堂行見會雲龍由來膚寸沾天下衡嶽英靈等  
岱宗

克庵先生尊德性齋小集卷之一